

中国边疆研究资料文库·边疆民族资料初编

# 西北及西南民族

中国边疆研究资料文库·边疆民族资料初编

# 西北及西南民族



清·曹振鏞等撰

欽定平定回疆剿擒逆裔方略

卷六二——七〇

清道光刻本

欽定平定回疆剿擒逆裔方略

三五七九





欽定平定回疆剿擒逆裔方略卷之六十二

道光八年夏四月甲戌

陝甘總督楊遇春奏報誠端哈朗阿等護解張  
逆於三月二十五日經過蘭州派委河州鎮總  
兵德克金布蘭州道程喬采等接護前進

丙子

英惠達凌阿奏報達凌阿管帶烏魯木齊等處

凱撤滿洲兵五百名由烏什起程於二月二十  
七日陸續歸伍英惠卽於是日將提督印信交  
達凌阿接收任事

戊寅

勅諭管束自軍營赦回遣犯

先是伊犁釋回遣犯一千五百名內有籍隸順  
天府遣犯李七房永和二名身帶軍功執照復

行犯竊經所司拏獲奏交刑部審辦至是刑科  
給事中吳傑疏奏發遣新疆之犯多係積匪大  
猾此次釋回一千五百名之多恐革面自新者  
不過什百之一二而怙惡不悛者不止李七房  
永和二人該犯等回籍取保仍可出境遊行且  
恃有軍功執照晝則冒爲良民夜則肆行偷竊  
或致另釀不法重案請

勅下原籍各該督撫轉飭州縣隨時稽查嚴加管束  
奏入

上諭內閣曰新疆遣犯或隨赴軍營效用或在該城  
隨同官兵防堵出力節經該將軍大臣等奏請准  
予免罪釋回飭交地方官妥爲安插嚴加管束該  
犯等既經得有軍功執照卽應革面自新乃屢有  
免罪回籍身帶軍功執照復出外疊次行竊之案

著該督撫嚴飭該州縣隨時稽查認真管束毋許  
一名出境該犯等如果在籍安分守法所給軍功  
執照尚可存留儻敢恃符玩法或稍滋事端卽將  
執照追繳塗銷嚴行懲辦經此次申諭之後該地  
方官毋得視爲文告故事自取咎戾

長齡那彥成奏報三月十五日長齡迎晤那彥  
成於阿克蘇面交善後一切事宜卽於十八日

起程齋印回京

巳卯

改撥葉爾羌烏什防兵更調辦事大臣

長齡那彥成奏言

臣

長齡原奏添設防兵八千

名內分撥葉爾羌二千名烏什一千名業蒙

允准茲與

臣

那彥成悉心商榷葉爾羌距卡外各部

落較遠本屬腹地雖回戶衆多內有阿克蘇爲

之聲援外有喀什噶爾爲之屏蔽設兵一千足資防守烏什逼近各布魯特遊牧爲極邊要地較之葉爾羌情形倍加緊要應請將葉爾羌防兵二千名內分撥烏什一千名共設兵二千名兵額旣增公事倍繁原設辦事大臣一員照料難周請將烏什辦事大臣多貴與伊犁領隊大臣布彥泰對調並請以西安協領德惠作爲烏

什幫辦大臣可期得力第添設幫辦一員歲需  
廉俸有關經費不能不通盤覈計查和闐僻在  
一隅回情淳樸舊設防兵祇二百餘名辦事大  
臣一員足資經理其幫辦一缺堪以改歸烏什  
於經費並無增添地方繁簡適得其宜現任和  
闐幫辦大臣富盛阿人雖老實惟精力漸衰以  
之調補庫爾喀拉烏蘇領隊似可勝任奏入

上命軍機大臣傳諭那彥成楊芳曰前據長齡等奏  
籌議善後章程請留防兵八千名分布各城以資  
鎮守茲既查明烏什地方近接外夷較葉爾羌尤  
爲緊要自應將議留葉爾羌防兵二千名內酌撥  
一千名添留烏什共計已有防兵二千名足敷分  
撥著照所請辦理並另降清字諭旨准其將布彥  
泰調補烏什辦事大臣其烏什應設幫辦大臣亦

卽准以德惠補授惟請將和闐幫辦大臣裁汰一節此時和闐甫經戡定雖僻在一隅防範亦關緊要未便遽行裁撤著暫仍其舊俟一二年後再行體察情形辦理現在和闐幫辦大臣富盛阿據稱精力漸衰是否尙能勝任著那彥成等詳加察看如難期稱職卽據實奏請撤回另行就近酌保一員請旨補授至葉爾羌辦事大臣已降旨賞給札

隆阿頭等侍衛更換恒敬著那彥成隨時詳察札隆阿如能辦理裕如卽隨時據實具奏

上又命軍機大臣傳諭那彥成武隆阿曰署喀什噶爾阿奇木伯克伊薩克自軍興以來諸事奮勉實心出力忠勤可嘉前經降旨加恩晉封爲郡王朕思乾隆年間出力回臣如額敏和卓玉素布俱曾用爲回城辦事大臣伊斯堪達爾曾任喀什噶爾

幫辦大臣現在伊薩克於喀什噶爾情形自爲熟悉其能否堪勝該處幫辦大臣之任著那彥成等留心察看據實覆奏

勅繪楊芳等小照圖像紫光閣

上命軍機大臣傳諭楊芳武隆阿曰此次平定回疆生擒巨憝大功告成軍營將帥大臣或督率有方或轉戰克捷應擇其勞績卓著者圖像紫光閣以

彰武功著楊芳武隆阿各繪小照一分並繪伊薩  
克小照一分附報呈覽以便繪圖

庚辰

上命桂輪馳驛迎赴前途隨同長齡來京並

頒賞長齡珠鑲碧霞弘帶板帶環三件黃辦珊瑚豆  
大荷包一對小荷包四箇交桂輪齎往

壬午